



12. august 2010

UKA 2010/76

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuna saqqummiupparput:

**Qilalukkanik qaqortanik qernertanillu illersuineq piniarnerlu pillugit Namminersornerullutik Oqartussat nalunaarutaat nr. 2, 12. februar 2004-meersoq Naalackersuisut allanngortitsinissaannik peqquneqarnissaannik Inatsisartut aalajangiiffigisassaattut siunnersuut, taamaallilluni kitaata qeqqani aammalu nunatta kujataani qilalukkanik qernertanik pisassiisoqassalluni**

(ATASSUT-ip Inatsisartuni ilaasortaataitai: Siverth K. Heilmann, Knud Kristiansen)

**Tunngavilersuut:**

Kalaallit Nunaata kitaata qiterpasissuani aammalu kujataani qilalukkanik qernertanik ukiuni arlalisuannngortuni pisassiisoqarnikuunngilaq, naak massa qilalukkat qernertat ingerlaartarnermini ukiuni arlalinni kujavarteraluttuinnaraluartut.

Qilalukkat qernertat kitaata qiterpasissuani aammalu kujataani amerliartornerisa kingunerisaanik sumiiffinni pineqartuni qilalukkanit nerineqartarnermikkut aalisakkat ikiliartulersimapput.

Tamanna tunngavigalugu aammalu sumiiffinni pineqartuni qilalukkat qernertat amerliartuinnarnerannik pineqartoq pillugu aalisartut piniartullu ilisimasaat tunngavigalugit, ATASSUT-mit isumaqarpugut illersorneqarsinnaasumik aammalu piujuaannartitsinissamik siunertaqarneq innarlinngikkaluarlugu qernertanik kitaata qeqqani kujataanilu pisassiisoqartalersinnaasoq, soorlu aamma qa-qortat eqqarsaatigalugit taamaaliortoqartalereersoq.

Inatsisini aammalu nalunaarutini tassunga atasuni pisassiisinaanermut periarfissat ammareermata matumani apeqqutaaginnassaaq Inatsisartut Naalackersuisunut pisassiinissamik peqqusinissaat.